

- प्रधानमंत्री नरेन्द्र मोदी अर रूस रा राष्ट्रपति ब्लादिमीर पुतिन साल 2030 ताई भारत-रूस आर्थिक सहयोग रा खास हलकां रा विकास कार्यक्रम ने मंजूरी दीनी।
- मुख्यमंत्री भजनलाल शर्मा श्रीगंगानगर मांय गंग नहर शताब्दी समारोह रो उद्घाटन अर फिरोजपुर फीडर ने और बेहतर बणावण रा काम री सरूआत कीनी।
- कृषि मंत्री किरोड़ीलाल मीणा कह्यो-राज्य मांय किसानां सारू खाद री कोई कमी नी है।
- केन्द्र सरकार उम्मीद पोर्टल माथे वक्फ सम्पत्तियां रो पंजीकरण नी करावण वाळां रे खिलाफ तीन महीना ताई जुर्मानो नी लगावण या करड़ी कार्रवाई नी करण रो भरोसो दिरायो।

000

प्रधानमंत्री नरेन्द्र मोदी अर रूस रा राष्ट्रपति ब्लादिमीर पुतिन बीचे नई दिल्ली मांय व्ही मीटिंग पाछे रक्षा, करोबार, माली व्यवस्था, स्वास्थ्य, भणार्ई-लिखाई, संस्कृति अर मीडिया ऊँ जुड़्या हलकां समेत न्यारा-न्यारा हलकां ऊँ जुड़्या केई करार माथे सही करी ज्यी। नई दिल्ली मांय व्ह्या 23 वां भारत-रूस वार्षिक शिखर सम्मेलन मांय दोन्यू नेता खबरनवीसां ने संबोधित कीना। प्रधानमंत्री मोदी कह्यो के राष्ट्रपति पुतिन रो दौरा ऐडा बगत व्हे रह्यो है जद भारत सागे केई ऐतिहासिक रिश्तां मांय खास प्रगति व्ही है। वे कह्यो लारला दस साल मांय दुनिया मांय आया भांत-भांत रा उतार-चढ़ाव बीचे भारत-रूस रा रिश्ता समय री कसौटी माथे खरा उतर्या है।

.....

मीटिंग रे दौरान दोन्यू नेता साल 2030 ताई भारत-रूस आर्थिक सहयोग रा खास हलकां रा विकास रा एक कार्यक्रम ने ई मंजूरी दीनी।

000

मुख्यमंत्री भजनलाल शर्मा आज श्रीगंगानगर रा साधुवाली मांय गंग नहर शताब्दी समारोह रो उद्घाटन कीनो। वे साधुवाली री गाजर मंडी अर फिरोजपुर फीडर ने और बेहतर बणावण रा काम री सरूआत ई कीनी। ई सागे ई वे ई हलका सारू 1 हजार 770 करोड़ रुप्या रा खर्च वाळा विकास रा कामां रो ऐलाण कीनो। ई मौके राख्यी ज्यी जनसभा मांय मुख्यमंत्री सांठा रो सरकारी मोल प्रति किंवटल 15 रुप्या बधावण अर अनूपगढ़ अर रावला हलका मांय 200 करोड़ रुप्या रा खर्च ऊँ नहरी तंत्र ने बेहतर बणावण रो ई ऐलाण कीनो। श्री शर्मा भरोसो दिरायो के नहरां ने मजबूत बणावण सागे ई सिंधु नदी रो पाणी ई पूगायो जावेला। मुख्यमंत्री कह्यो के वां रा राज मांय किसानां ने दूजा राज्यां रे मुकाबले बत्तो बोनस दियो जा रह्यो है अर कुसुम-ए योजना मांय राजस्थान देश मांय अव्वल है। वे श्रीगंगानगर रा किसानां ने बेगी ई दिन मांय ई बिजली मुहैया करावण रो भरोसो दिरायो।

000

भारतीय रिजर्व बैंक माली विकास ने और तेज करण रा मकसद ऊँ ब्याज री रेट मांय 25 आधार अंकां री कटौती कर र इण ने सवा 5 फीसदी कर दीनी है। आरबीआई रा गवर्नर संजय मल्होत्रा चालू माली साल री पाँचवीं द्विमासिक मौद्रिक नीति रो जायजो लेवण सारू व्ही मीटिंग रे दौरान ओ ऐलाण कीनो। केन्द्रीय बैंक रा ई फैसला ऊँ मकान अर गाड़ियां री खरीदी समेत भांत-भांत रा कर्ज सस्ता व्हेवण रा आसार है।

000

हिंसा रा असर वाळी अर संकटग्रस्त महिलावां ने मदद देवण सारू देश मांय 864 वन स्टॉप सेंटर काम कर रह्या है। महिला अर बाल विकास राज्य मंत्री सावित्री ठाकुर आज लोकसभा मांय एक लिखित जवाब मांय आ जाणकारी दीनी। वे बतायो के साल 2015 मांय इण री सरूआत पाछे देश मांय हाल ताई 12 लाख 67 हजार ऊँ बत्ती महिलावां ने मदद दीरीजी है। अ केंद्र ज़रूरतमंद

महिलावां ने चिकित्सा सहायता, अस्थायी आश्रय, पुलिस सहायता अर मनो-सामाजिक परामर्श सरीखी सेवावां ई देवे है।

000

प्रदेश रा सगळा मोटा अस्पताला मांय अब जयपुर रा जयपुरिया अस्पताल री भांत क्यू मैनेजमेंट सिस्टम अर हेल्प डेस्क व्यवस्था सरू करी जावेला। चिकित्सा शिक्षा विभाग री प्रमुख शासन सचिव गायत्री राठौड़ आज जयपुरिया अस्पताल रा औचक दौरा पाछे अ हुकम दीना। वे कहयो के सगळा मोटा अस्पताला ने गुणवत्ता प्रमाण पत्र हासिल करणो चाहिजे अर स्वास्थ्य सुबीतां रा ऊंचा मानक पूरा करणा चाहिजे। वे जयपुरिया अस्पताल मांय न्यूरो अर कार्डियक सुबीता और बेहतर बणावण रा ई हुकम दीना।

000

कृषि मंत्री डॉ. किरोड़ी लाल मीणा कहयो है के राज्य मांय किसानां सारू खाद री कोई कमी नी है अर इण री पूर्ति लगातार करी जा रही है। वे आज जयपुर मांय खबरनवीसां सागे बातचीत कर रहया हा। कृषि मंत्री कहयो के खाद री कमी वाळा ब्लॉक अर ज़िलां री पिछाण कर र वठे तुरत पूर्ति करी जा रही है। खाद ने गैर कानूनी तरीका ऊँ भेळो करण अर यूरिया डायवर्जन रा मामलां मांय राज्य मांय हाल ताई पुलिस मांय तीस रपट दर्ज करायी जा चुकी है। आ कार्यवाही श्रीगंगानगर, टोंक, अलवर अर नागौर समेत केई ज़िलां मांय करी ज्यी। मंत्री बतायो के ई बगत राज्य मांय 1 लाख 67 हजार मीट्रिक टन यूरिया अर 66 हजार मीट्रिक टन डीएपी रो स्टॉक मौजूद है।

000

राज्यपाल अर विश्वविद्यालयां रा कुलाधिपति हरिभाऊ बागड़े आज कृषि विश्वविद्यालय, जोधपुर मांय अहलकारां सागे मीटिंग कीनी। ई दौरान वे कहयो के कृषि शिक्षा रो मकसद खेती-बाड़ी ने विज्ञान, तकनीक अर नवाचार ऊँ जोड़ र किसानां अर देश ने मजबूत बणावणो है। राज्यपाल ज्ञान, शोध अर नवाचार रो फायदो सीधा किसानां ताई पूगावण माथे ज़ोर दीनो।

000

केन्द्रीय अल्पसंख्यक कार्य मंत्री किरें रिजिजू उम्मीद पोर्टल माथे वक्फ संपत्तियां रो पंजीकरण नी करावण वाळां रे खिलाफ आवता तीन महीना ताई जुर्मानो नी लगावण रो भरोसो दिरायो है। ध्यानजोग के वक्फ संपत्तियां रा रजिस्ट्रेशन रो आज आखिरी दिन हो। नई दिल्ली मांय खबरनवीसां सागे बातचीत करता थकां रिजिजू कहयो के ओ फैसलो केई सांसदां अर समुदाय रा नुमाइन्दा कानी ऊँ मुतवल्लियां सामी आवण वाळी चुनौतियों रो हवालो देता थकां और बगत देवण री मांग पाछे करी ज्यो।

000

राज्य मांय चाल रहया वोटर लिस्टां रा पुनरीक्षण रा खास अभियान रा तैत सवाईमाधोपुर ज़िला मांय चार ई विधानसभा हलकां रा करीब साढ़े 10 लाख मतदातावां रा गणना प्रपत्र डिजिटाइज़ करण रो काम पूरो कर लियो ज्यो है। आं प्रपत्रां रो साल 2002 री मतदाता सूचियां सागे मिलान रो काम ई पूरो व्हे ग्यो है। ज़िला निर्वाचन अधिकारी काना राम कहयो के ई काम मांय सगळा बीएलओ अर संबंधित अहलकार अर कर्मचारी खास योगदान दीनो।

000

जयपुर रा सेंद्रल डिटेक्टिव ट्रेनिंग इंस्टीट्यूट-सीडीटीआई मांय रॉयल भूटान पुलिस रा अहलकारां रो खास सिखावण कार्यक्रम आज पूरो व्हे ग्यो। तीन दिन रा ई कार्यक्रम मांय 'क्रिप्टो करेंसी अर डार्क वेब अपराधां री जांच रा बारा मांय खास सिखावण दीरीजी। सीडीटीआई रा निदेशक डॉ. अमनदीप सिंह कपूर बतायो के अहलकारां ने क्रिप्टो करेंसी ट्रैकिंग, डार्क वेब पहचान अर साइबर फोरेंसिक टूल्स काम लेवण सरीखी तकनीकां रा बारा मांय जाणकारी दीरीजी।

000

बांसवाड़ा रा श्री गोविंद गुरु राजकीय महाविद्यालय मांय केंद्रीय संचार ब्यूरो, डूंगरपुर री ओर ऊँ लगाई ज्यी तीन दिन री मल्टी मीडिया प्रदर्शनी आज पूरी व्हे ग्यी। केंद्रीय संचार ब्यूरो रा सहायक निदेशक रामेश्वर लाल मीणा बतायो के प्रदर्शनी मांय केंद्र अर राज्य सरकार रा न्यारा-न्यारा महकमां री ओर ऊँ जनता रा भला री योजनावां री जाणकारी दीरीजी। ई दौरान केई होड़ां राख्यी ज्यी, ज्यां मांय जनता बढ़-चढ़ र हिस्सो लीनो। जीतण वाळां ने ब्यूरो री ओर ऊँ ईनाम दिया ज्यो।

000